



Siège national
47 rue d Clichy
75311 Paris Cedex 09
Tél : 01 45 96 03 05

FIARAHA-MIVAVAKA Alarobia 08 AVRIL 2020

Lohahevitra: « MAMELATRA LATABATRA EO ANOLOAKO EO IMASON'NY FAHAVALOKO HIANAO »

Mpitarika : Pst Seth Rasolondraibe

Amin'ny anaran'ny Ray sy ny Zanakany sy ny Fanahy Masina

HIRA 548 and 1 sy 3

Vavaka

VAKITENY 1a SALAMO 23

Ny Mpiandry Tsara

1Salamo nataon'i Davida. Jehovah no Mpiandry ahy, tsy hanan-java-mahory aho, 2Mampandry ahy amin'ny ahi-maitso Izy; mitondra ahy eo amoron'ny rano fialantsasatra Izy. 3Mamelombelona ny fanahiko Izy; mitarika ahy amin'ny lalan'ny fahamarinana noho ny anarany Izy.

4Eny, na dia mandeha mamaky ny lohasaha aloky ny fahafatesana aza aho, dia tsy hatahotra ny loza aho, fa Hianao no amiko; ny tsorakazonao sy ny tehinao, ireo no mahafa-tahotra ahy. **5Mamelatra latabatra eo anoloako eo imason'ny fahavaloko Hianao**; manosotra diloilo ny lohako Hianao; ny kapoakako feno dia feno. 6Eny tokoa, fahasoavana sy famindram-po no hanaraka ahy amin'ny andro rehetra hiainako, dia hitoetra ao an-tranon'i Jehovah andro lava aho.

Fampidirana : Herinandro masina "Mamelatra latabatra eo anoloako eo imason'ny fahavaloko Hianao"

HIRA Antoko Mpihira : « ESOERY RE RY RAIKO. »

Vakiteny 1b. MATIO 26.1-13

1Ary rehefa vitan'i Jesosy izany teny rehetra izany, dia nilaza tamin'ny mpianany hoe Izy: 2Fantatrareo fa raha afaka indroa andro, dia ho tonga ny Paska, koa ny Zanak'olona dia hatolotra hohomboana amin'ny hazo fijaliana. 3Ary tamin'izany dia nivory ny lohan'ny mpisorona sy ny loholona tao an-kianjan'ny tranon'ny mpisoronabe atao hoe Kaiafa. 4Ary niara-nihevitra izy hisambotra an'i Jesosy amin'ny fitaka ka

hamono Azy; 5kanefa hoy izy: Tsy amin'ny andro firavoravoana, fandrao hisy tabataba amin'ny olona.

6Ary nony tany Betania Jesosy, tao an-tranon'i Simona boka, 7dia nanatona Azy ny vehivavy anankiray nitondra tavoara alabastara feno menaka manitra saro-bidy loatra, ka naidiny tamin'ny lohany izany, raha nipetraka nihinana Izy. 8Fa nony nahita izany ny mpianatra, dia tezitra ka nanao hoe: Inona no anton'izao fandanium-poana izao?

9Fa azo namidy ho lafo be iny ka homena ny malahelo. 10Ary fantatr'i Jesosy izay nataon'ireo, ka dia hoy Izy taminy: Nahoana ianareo no mampalahelo an-dravehivavy? fa asa soa no nataony tamiko. 11Fa ny malahelo dia eto aminareo mandrakariva, fa Izaho tsy mba ho eto aminareo mandrakariva. 12Fa izy no nampidina izany menaka manitra izany tamin'ny tenako, dia ny hamboatra Ahy halevina no nanaovany izany. 13Lazaiko aminareo marina tokoa: Na aiza na aiza amin'izao tontolo izao no hitoriana ity filazantsara ity, dia holazaina koa izay nataon-dravehivavy mba ho fahatsiarovana azy.

Fanazavana Fohy

HIRA 95.1

VAVAKA ISAM-PIANAKAVIANA

Mba ho ravan'Andriamanitra ny Tambajotra mpanao ratsy

Tsy hanaiky hiditra amin'ireny ny Mpino

Tsy ho taitra fa hatoky ny Tompo raha azon'ireny

VAVAKA MPITANDINA

VAKITENY 2. MATIO 26.14-19

14Ary ny anankiray tamin'ny roa ambin'ny folo lahy, atao hoe Jodasy Iskariota, dia nankao amin'ny lohan'ny mpisorona 15ka nanao hoe: Homenareo hoatrinona aho hanolorako Azy aminareo? Ary izy nandanja sekely volafotsy telo-polo homena azy. 16Ary hatramin'izay no nitadiavany izay andro hahazoany mamadika Azy.

17Ary tamin'ny voalohan'ny andro fihinanana ny mofo tsy misy masirasira dia nankeo amin'i Jesosy ny mpianatra ka nanao hoe: Aiza no tianao hamboarinay hihinananao ny Paska? 18Ary hoy Izy: Mankanesa any an-tanàna ho any amin-drarahilaha, ka lazao aminy hoe: Hoy ny Mpampianatra: Efa akaiky ny fotoako; koa ato aminao Aho sy ny mpianatro no hitandrina ny Paska. **19Ary ny mpianatra dia nanao araka ny nasain'i Jesosy nataony ka namboatra ny Paska.**

Fanazavana Fohy

HIRA 95.2

VAVAKA ISAM-PIANAKAVIANA

Tsy ho vonona hiady ny mino fa ho vonona hihavana
Hitondra fanavaozana ho an'ny Fianakaviana ity Paska ity
Ho an'ny Fiangonana koa....

VAVAKA MPITANDINA

VAKITENY 3. MATIO 26.20-25

20Ary nony hariva ny andro, dia nipetraka nihinana Izy mbamin'ny mpianatra roa ambin'ny folo lahy. 21Ary raha mbola nihinana izy, dia hoy Jesosy: Lazaiko aminareo marina tokoa fa ny anankiray aminareo hamadika Ahy. 22Dia nalahelo indrindra izy rehetra, ka samy nanontany Azy hoe: Moa izaho va izany, Tompoko? 23Ary Izy namaly ka nanao hoe: Izay niara-nanatsoboka ny tàmany tamiko tao anatin'ny lovia, izy no hamadika Ahy. 24Ny Zanak'olona dia mandeha tokoa araka izay nanoratana Azy, nefa lozan'izay olona hahazoana ny Zanak'olona hatolotra! tsara ho an'izany olona izany raha tsy ary akory. 25Ary Jodasy, izay namadika Azy, dia namaly ka nanao hoe: Izaho va izany, Raby ô? Dia hoy Izy taminy: Voalazanao.

Fanazavana fohy

HIRA 95.3

VAVAKA ISAM-PIANAKAVIANA

Mba ho tsapan'ny tsirairay ny fitiavan'i Jesosy...
Mba homeny antsika koa izany fitiavany izany...
Hifankatiavan'ny mino rehetra

VAVAKA MPITANDINA

VAKITENY 4. MATIO 26.26-35

26Ary raha mbola nihinana izy, dia nandray mofa Jesosy, ka nony efa nisaotra Izy, dia novakiny ka natolony ny mpianatra, ary hoy Izy: Raiso, hano, ity no tenako. 27Ary nandray kapoaka Izy, ka nony efa nisaotra, dia natolony azy ka nataony hoe: Sotroinareo rehetra ity; 28fa ity no rako, dia ny amin'ny fanekena, izay alatsaka ho an'ny maro ho famelan-keloka.

29Ary lazaiko aminareo fa hatramin'izao dia tsy mba hisotro itony vokatry ny voaloboka itony intsony Aho mandra-pihavin'ny andro hiarahako misotro izay vaovao aminareo any amin'ny fanjakan'ny Raiko.

30Ary rehefa nihira fiderana izy, dia lasa nankany amin'ny tendrombohitra Oliva. 31Ary tamin'izany dia hoy Jesosy taminy: Hianareo rehetra dia ho tafintohina noho ny amiko anio alina; fa voasoratra hoe: Hamely ny mpiandry Aho, dia hihahaka ny ondry andrasana (Zak. 13. 7). 32Fa rehefa atsangana Aho, dia hialoha anareo ho any Galilia. 33Fa Petera namaly ka nanao taminy hoe: Na dia ho tafintohina noho ny aminao aza ny olona rehetra, izaho tsy mba ho tafintohina mandrakizay. 34Hoy Jesosy taminy:

Lazaiko aminao marina tokoa fa anio alina, raha tsy mbola misy akoho maneno, dia handà Ahy intelo ianao. 35Hoy Petera taminy: Na dia hiara-maty aminao aza aho, tsy mba handà Anao tokoa aho. Ary toy izany koa no nolazain'ny mpianatra rehetra.

Fanazavana Fohy:

HIRA 95.4

VAVAKA ISAM-PIANAKAVIANA Ny fianakaviana sy ny Fiangonana mba ho akaiky ny Tompo

VAVAKA MPITANDINA

Teny FANDRAVONANA

MAT 26.39-

39Ary nony nandroso kelikely Izy, dia niankohoka ka nivavaka hoe: Raiko ô, raha azo atao, dia aoka hesorina amiko ity kapoaka ity; nefa aoka tsy ny sitrapoko anie no hatao, fa ny Anao. 40Ary nankeo amin'ny mpianatra Izy ka nahita azy matory, dia hoy Izy tamin'i Petera: Hay! tsy mahazaka ny miara-miari-tory amiko na dia ora iray ihany aza ianareo! 41Miareta tory sy mivavaha ianareo, mba tsy hidiranareo amin'ny fakampanahy; mety ihany ny fanahy, fa ny nofo no tsy manan-kery. 42Dia nandeha fanindroany Izy ka nivavaka hoe: Raiko ô, raha tsy azo esorina ity, fa tsy maintsy hosotroiko, dia aoka ny sitraponao no hatao.

Vavaka farany vavaka nampianarin'ny Tompo

ANTOKO MPIHIRA "Ry fitiavan'i Jesosy FFPM 99"

TSO-DRANO

24Ary ho an'izay maharo anareo mba tsy ho tafintohina, ary hametraka anareo tsy hanan-tsiny eo anoloan'ny voninahiny amin'ny firavoravoana, 25ho an'Andriamanitra tokana, Mpamonjy antsika, amin'ny alalan i Jesosy Kristy Tompontsika anie, ny voninahitra sy ny fahalehibiazana, ny fanjakana sy ny fahefana hatramin'ny taloha indrindra sy ankehitriny ary mandrakizay. Amena.